

**DE JVRE PERSONARVM,  
QVAS VVLGVS LARVAS  
SEV MASCHERAS  
DICTITAT, IN  
ANNIVERSARIA...**

---

Johann Christian Nohr, Christoph  
Heinrich "von" Berger



12887-B.



Q. D. B. V.

DISSERTATIO INAUGVRALIS IVRIDICA

DE

IURE PERSONARVM,

QVAS VVLGVS

LARVAS SEV MASCHERAS DICTITAT,  
IN ANNIVERSARIA CARNISPRIVII, QVOD CARNAVAL VOCATVR,  
SOLEMNITATE,

Bom

CARNAVAL-Recht!

QVAM,

PRAESIDE

CHRISTOPHORO HENRICO DE BERGER,  
COMITE PALATINO CAESAREO, P. P.

DICASTERIORVM IVRIDICORVM, QVAE VITEMBERGAE FLORENT,  
ITEMQVE IVDICII PROVINCIALIS, IN MARCHIONATV INFERIORIS  
LYSATIAE, ASSESSORE,

PRO LICENTIA

SYMPOS IN VTROQVE IURE HONORES

ET

PRIVILEGIA DOCTORALIA

OBTINENDI,

AD. D. XXI. MART. MDCCXX.

HORIS ANTE ET POST MERIDIEM CONSTITVTIS,

TVEBITVR

JOANNES CHRISTIANVS NOHR,  
LANGENSALZA-THVRING.

VITEMBERGAE, LITERIS VIDVAE GERDESIAE. aa





§. I.



Est quoddam anniuersariae solemnitatis genus, quod uulgo *Carnaua* uocatur, publici ritus apparatu distinctum, et tanto Regum, Principum Rerumque publicarum studio cultum ac celebratum, ut eius memoria, tanquam suscepto institutae celebritatis certamine, longe lateque recolarur, et omnis fere, qua patet, Europae amorem hilaritatis exemplo excitare ac complecti uideatur. Quam ob rem, operae pretium nos facturos, arbitramur, si quidem idem illud argumentum, pro dignitate eiusdem ac excellentia, pertractatione rament originis huius solemnitatis, quae ex peruestigatione cum nominis, tum maxime rei ipsius, critico historicoque more, instituat, in aliud tempus nobis referuata, modo, qui Iuris peritos deceat, et uberiore explanatione pertractetur, idque ea differendi lege, ut, quid hoc loco et moralis ratio, (cui sententia, ut in laruis nihil inesse uitii culpaue

intelligi possit, si modo intra sobrium et innocentem consistant usum, et honestatis iustitiaeque finibus contineantur, repugnare minime uidetur,) et in primis iuris disciplina, praecipiat, diligenter expendatur, ac aequitati morali civilis superstruatur.

## §. II.

Ratione autem nominis hic meminisse iuuabit, *Carnaualis*, *Carneualis*, et *Carnoualis*, uocabulis, cum *Carnispriuii* et *Carneleuaminis*, nominibus, si non prorsus atque omnino, certe ita, ut parum inter ea intersit, conuenire. Etenim intelligendum est, nomen *Carneualis*, praecipuo Italarum Gallorumque usu inuentum et frequentatum, atque omnis prope Europae dicendi consuetudine comprobatum receptumque, tanquam per iocum id uelle, quod *Carne*, uel Latine, *Caro*, *uale*. Hoc est: Caro, uale, ubi prius aliquot adhuc hebdomadas nos fatiaueris, adeo, ut nos tui postea taedeat fere, et, quod imminet, ieiunii quadragesimalis tempore, pisce, oleo, ouo, contenti, tui facilius obliuiscamur. Similiter, nonnihil origini consuli, nec nullum imponi praesidium, opinamur, si contendamus, *Carneual* a *Caro*, *uale*, non minori iure, quam *Carneleuamen* a *Carnis leuamine*, et *Carnispriuium* ab eius priuatione, duci posse.

## §. III.

Aequitate, e contrario, civili designamus iustum magistratus, laruarum usus, festiuis temporibus,



bus, ubi id moris semel tenuit, bene dirigendi et gubernandi temperamentum, adeo, ut quamvis ex conniuentia eae tolerentur, suis tamen cancellis et limitibus prudenter circumscribantur.

#### §. IV.

Ac, dum, conniuentibus quidem oculis, ut VLPiani uerba e *l. 4. §. 1. π. de manumiss.* huc quodammodo referamus, non habita stricti iuris ratione, superiorem in Republica personatos laruosque, separatis quibusdam solemnium temporibus, intueri posse, asseueramus, nihil aliud dictum uolumus, quam patientia, quae Valentiniano et Valenti Imperatoribus, pro consensu est, *l. 6. §. 1. C. de postul.* ac quadam ueluti dissimulatione, huius generis consuetudines, quae quidem inueterauerint, a principe indulgendas quidem esse, cum subiectorum animos, spatio interualloque negotiis et curis dato, relaxari nonnunquam oporteat: nullo autem modo eo licentiae progrediendum, ut, cum nondum prouinciae cuiusdam a tempore, memoria non comprehendendo, innotuerint personae gestaeue sint, libere adeo publici iuris reddantur. Impedimento enim est abusus, non leuis metus, quem a uulgi et ima uulgi fece, in his talibus et consimilibus ludicris, uix bene discerni solere, adhuc creditum fuit atque existimatum.

#### §. V.

Aliud futurum, haud difficulter dignoscitur, si soli domino, eiusque aulae et curiae, hae oblectationum

tionum ambitiones fartae et tectae seruentur, cum Principes, ob lenimenta, quibus ardua curarum et imperii molestias distingui licet, suo modo melius decere uideantur, nec tam prono adeo sensu in deteriorem partem, et prauam sinistramque publici exempli legem, ulterius detorqueri mereantur. Quo pacto adduci non possumus, ut credamus, illud Augusti, Imperatoris, praesertim cum Deastrorum illius aetatis illufio sub hoc quasi inuolucro lateat, epulum in reprehensionem magnopere incurrere, uulgo *δωδεκάθεον* nominatum, quod amicis dedisse, apud TRANQVILLVM in eius *uita*, *Cap. LXX.* legitur, in quo, Deorum Deorumque habitu exornati, conuiuiae discumbebant, et Caesar ipse, Apollinis praecipue ornatu uestitus, conspiciebatur. Licet diffiteri non posimus, bonum cetera Principem rationem conditionemque illorum temporum prudentius circumspicere potuisse. Acclamabant enim publice, Deos frumentum omne comedisse, cum summa penuria et fames, inter haec, ciuitatem urgeret. Eodem attinet, quod *Lib. XII. cap. 9.* ATHENAEVS refert, Alexandrum illum Magnum, cum lautius solito conuiuia celebraret, nunc Ammonis habitum purpureum et cornua, tanquam Deum, gestasse, nunc in Dianam, aut Herculem, aut Mercurium, mutatis personis, se refinxisse. Quae quidem formae fingendae genera, nisi a fastu, cum diuini honoris affectatione coniuncto, et Alexandro in more posito, uitium fortasse capiant, ob liberiores certe animi exhilarationem in tanto Principe minus uituperabuntur.

§. VI.

Quod si frequentissimum, et maioribus nostris tritum maxime, Torneamentorum lulum, quem, uno nomine Torneamen appellatum, idem esse, quod Troianum agmen, DRACO de *Patriciis* p. 269. n. 40. *seqq.* iuxta cum aliis, opinatus est, contemplemur: dici uix potest, quot quantisque occultationum, uel si mauis, delaruationum generibus, una cum mascheratis, ut ita dixerim, equis lutores eius campo quondam inerrarint, hodieque diuagentur in illis, quae in illarum locum successerunt, exercitationibus iaculatoriis, uulgo Caroussel, Kopff- oder Quintan- und Xingel: Xennen, et sic deinceps. Nihilominus, praeterquam, quod B. noster CARPZOVIVS P. III. *Decis.* 296. a n. 2. usque ad n. 11. et *Practic. Crim. Part. III. Qu.* 134. n. 15. haec aliaque huius generis, equestria et militaria certamina ueluti licita, copiosius asseruit ac defendit, ab ipso etiam IVSTINIANO IMP. in l. 1. et 3. C. de *aleator.* modo sine dolo et callidis machinationibus fiant, quasi permittuntur. Ait enim: *Duntaxat autem ludere liceat μονόβολον*, id est, singulari saltu; *liceat item ludere κοντομονόβολον*, hoc est, saltu conto suffulto, *κυντανόν κόντακα*, seu Quintanum contacem, et item *liceat ludere* (ubi alii secundum DIONYSIVM GOTHOFREDVM in *Annotat. ad d. l.* legunt κατ' αμφο, uel Catampo uel Catabo, quod genus ludi est Festo) *χωρίς τῆς πόρπης*, id est, ludere uibratione *Quintiana*, absque spiculo siue aculeo aut ferro, a quodam *Quinto* ita nominata hac lusus specie. *Liceat item*

item ludere περιχρῆν, id est, exerceri lucta: liceat vero etiam exerceri hippice, id est, equorum cursu, seu hippodromo absque dolo et circumuentione. Quo quidem loco accumulare non uacat, quae enarratores ad *bas LL. de hippice*, Troia siue Pyrrhica, cui similes sunt *κιντζούδρα* et *τόρε* ludi, explicati a NICEPHORO aliisque pugnis, tam pedestribus, quam equestribus, coaceruarunt. Quamuis autem decreto concilii Lateranensis, quod repetitur in *c. 1. et 2. X. de Torneam. a. 1179.* Romae habiti, eiusmodi certamina penitus interdicantur: tamen ea tantum ibidem uetari, in expedito est, in quibus, per prouocationem, certo non solum corporum, sed etiam animorum, exitio, pugnabatur, ut auctor est CAROLVS SIGONIVS de *Regn. Ital. Lib. XI. p. 273.* Quam ob rem Ioannes XXII. *c. 1. X. de Torneam.* hanc, modo commemoratam, Clementis Pontificis Constitutionem, cum eius rationem partim non satis generalem, partim, ob alias quasdam *περιστοιχεις*, quae ab eo indicantur, nonnihil incommodam, deprehenderet, in quibusdam regnis Torneamenta inhihentem sub poena excommunicationis et *interdicti*, *a. 1316.* rescidit irritamque fecit, et illos, qui huius occasione in iudicium adducti erant, absoluit. Ecquid tandem sanctiones Pontificum, ut hac in re uerbis utar CARPZOVIANIS, memorat. *Decis. 296. n. 9.* ad nos, quae sane derogare nequeunt legibus Imperatorum? quibus pugilationem artemque athleticam nouimus probatam et suffultam, *l. 4. in pr. π. de bis, qui not. infam. l. un. C. de athleticis, l. 5. C. quae res pign.* Ne uero cuiquam

quam in mentem ueniat suspicari, ac si nos illorum studiosis ludorum, quorum mentionem fecimus, laruas affinxissemus tantum, praeter ea, quae hodierna et publica fama, von denen Gesellen Nationen etc. Ringrennen / quibus certe peragendis indutae subsint personae, oportet, tot retro uicibus, nos quoque docuit: audiat, quaeso, uerba LIMNAEI, *Tom. I. Addit. Iur. publ. Lib. VI. c. 5. n. 125.* De ueteri quodam apud Maiores nostros hastiludii genere, Bundwerdt dicto, quod idem cum illo, in Principis sui Bibliotheca depicto, coniicit, cui addita inscriptio, das Kennen in den alten Pund genannt. Eodem in libro, repraesentari, testatur hastiludia alia, nempe, das alt Teutsch Gesteck in hohem Zeug / das Teutsch alt Krönlin Gesteck / das alte Geschift Lärzen Kennen / das Welisch Kennen in den Armen / das Feldbrennen in den stehlin Pund / und stehling Liger / ein Turnier zu Ross in Schimpf und Ernst zu gebrauchen / das Kennen mit dem Wulst / und die Lärzen vest angezogen / das Geschift alt Teutsch Scheiben rennen / das Gesteck / so man nennt / im Pain / das alte Kennen in den Scheiben Schweif / und den das Pfannen rennen. Ex quibus profecto uerbis iudicari facile potest, antiquitus haec talia ludorum genera, laruis adhibitis, exerceri consueisse, neque adeo, capite forte et collo ueluti obtorto, tracta ad nostram memoriam, quae protulimus, uideri. Subiungit autem, quem laudauimus, LIMNAEVS, se quidem ex his picturis propriam cuiusque hastiludii notam non deprehendisse, et quae inter illa fuerit differentia, undeque nominum sit diuersitas, antiquitatis

B

quasi

quasi nube tegi. De quibus plura qui uolet, inter multos alios adire poterit IOAN. AQUILAM, de *Omni ludorum genere*, qui pro instituti ratione, sat diligenter et bene, hoc argumentum explicuit. Quid autem de GEORGII RÜXNERI *Torneamentorum libro*, uulgo *Thurnier-Buch* / sentiendum sit, et num sublestae non nihil fidei, idque non ratione ipsorum hastiludiorum, sed circumstantiarum quarundam confictarum, habita, putari queat, uide, quae de eo ZEILERS in *Continuat. Itiner. German. I. p. 36.* alii-que, ab eo commemorati, item DN. STRVV. in *Dissert. de doct. impost. §. 37.* existimarunt.

### §. VII.

Fac uero, sequamur filum uulgo receptum, atque adeo ius Mascherarum secundum *personas, res et actiones* exigamus. Primum igitur dicendum est de personis. Vbi dixisse iuuat, mascherarum usum, per se suaue natura, *αἰσθητικόν* esse, ac, neque rectae rationi, neque diuino illi iuri, quod omnibus est obseruandum, repugnare, quamuis circa illum uaria contingere soleant, quae uel mala sint, uel malis dent occasionem, atque propterea expediat, usum illarum uel temperari, uel interdici plane ac prohiberi. Qualem legem in Gallia Franciscus I. tulit, quae tamen paulo post exoleuit, LANGLAEVS, *Semest. I. §. c. 9.* GREGOR. THOLOSANVS, *Syntagm. Jur. Vniu. lib. 39. cap. 11.* Similem in Anglia extare, docet, POLYDORVS VERGILIUS, de *Rer. inuent. I. §. c. 2.* qua capitale est, si quis personam induerit, PACICHELLIVS, de *Laruis c. 6. p. 84. seq.* Pari modo in Ducatu Würtembergico

gico Bacchanalia, sub poena carceris, uetita sunt his uerbis: Dieweill auch das Kommen und die Buzen-Kleider / sonderlich die / da sich Frauen in Manns- und Mannen in Frauen-Kleider verstellen / x. so verbietzen Wir ernstlich / daß Niemand zu einiger Zeit des Jahres mit verdeckten Angesicht / oder in Buzen-Kleidern gehen soll / bey Straffe des Thurns oder Narren-Häusleins. uid. *Ordin. Prouinc. Württemberg. tit. 102. von Fastnacht-Rüchlein und Buzen-Kleidern. §. 3. Quod si itaque in ciuitate neque mores, neque ius scriptum, usum Mascherarum prohibeant, permissum eundem esse, merito censeas, arg. l. 28. §. 2. π. ex quibus caus. mai. l. ult. C. de reb. alien. non alienand. ubi Glossa et DD. et quidem omnibus, cuius tandem cunque status sint et conditionis. Quae enim ex permissorum genere sunt, omnibus licent, nisi fortasse prohibita esse, doceri possint, arg. l. 43. §. 1. π. de procurat. ubi DD.*

## §. VIII.

Quum uero, natura duce, omne hominum genus in mares ac feminas diuidatur, de utrisque ordine nunc erit dicendum. De uiris uero non adeo multum est dubii, quibus pro maiori perfectionis ac dignitatis excellentia, multa licent, quae sexui elegantiori, ob animi fragilitatem, qua plerumque laborat, uel ob pudorem quoque, denegari solent, l. 1. π. §. 5. de postuland. l. 2. π. de R. I. l. 8. π. de senat. adeo, ut in multis iuris partibus deterior feminarum, quam uirorum, sit conditio, l. 9. π. de stat. hom. Atque,

cum mascherarum usus ideo maxime receptus sit vel permissus, ut honesta quadam uoluptate incommoda, quae onera ciuilia, vel domestica, secum ferunt, mitigentur, onera uero ista sexum, praesertim uirilem, premant, huic potissimum usum personarum permissum esse, nemo dubitabit.

### §. IX.

De feminis uero haud immerito dubitatio oriri potest. Namque certissimum est, et nemo facile in dubium uocabit, mascheras quam maximas pudori insidias struere, ac, praecipue sexui imbecilliori, et ad lapsum hunc facili, esse periculosas.

*Quem praestare potest mulier galeata pudorem,  
Quae fugit a sexu?*

inquit IUVENALIS, *Satyr. 6.* Omnibus itaque modis cum cauendum sit, ne feminae honestae in periculum eiusmodi incidant, uel tale quid admittant, ex quo laesae pudicitiae uel suspicio suboriri queat; arcendae omnino ab his praecipitibus, ex quibus in lasciuiam prolabi possunt, uidentur. Quorsum spectat *Phintyos*, filiae *Callicratis Pythagorae*, apud *STOBAEVM*, *Serm. 72. pag. 406. seq.* documentum, ut *matres familias abstineant ab Orgiis, Bacchi et a matris Deum sacris*: omniaque illa, quae, pro seruando feminarum pudore, Romana Iuris prudentia, tam sollicitè, excogitauit. Ad quae inter alia etiam pertinet, quod mulieribus honestis minime licuerit, prodire in scenam, aut artes ludicras exercere. Nam quae talia admittebant, infames habebantur, *l. 44. π. de Rit. Nupt. l. 1. 2. §. ult. π. de his, qui*  
*not.*



*not. infam.* Quoniam tamen non omnino, ex quibus occasionem mala nanciscuntur, uel quae cum abusus coniuncta sunt, et casu uel fortuito mala fiunt, statim illicita sunt: ideo nec propter malos, remedia ad malum utentes finem, boni ab usu illius protinus arcendi, neque ullum aliud interdictum extat, quod feminas a mascheris plane remoueat; in illisque, ubi in sexu debiliori singulare nihil est constitutum, par utriusque est conditio, *l. 4. C. de liber. praeter.* PRUCKMANNVS, de *Different. utriusque sex.* Alia item ratio est feminarum, quae lucri causa artem ludicram exercent, quam illarum, quibus de iam est quaestio. Praeterea feminis non inuidendum est honestum uoluptatis genus, qua curas interpellent domesticas ac molestias, quae sexum hunc, prae altero, in procreanda sobole premunt, et ex ciuilibus quoque oneribus in eum redundant, leniant. Itaque concludendum erit, usum mascherarum feminis esse permissum, illasque tam personatas, quam absque mascheris, personatorum coetui interesse, uel has, pro regionis more, admitti posse, modo abusum fugiant, nullumque obstet ius singulare, quod huic sexui terminos finesque ponat.

§. X.

At, cum sine abusu usus is uix esse possit, ex eaque re maximum feminis honestis periculum immineat, quarum pudor, occasione data, facile uim pati, atque adeo ex his illecebris detrimentum capere potest, satius omnino est, omnes feminas lege

arceri ab his malorum irritamentis. Romae constitutio habetur, qua non licet mulieribus, capite corporeque personato, incedere. Nam, quae larua uestituque fictitio deprehenditur, meretricis loco habetur, et poenam 300. Scutorum, aliamque arbitriam, etiam corporis, pro arbitrio iudicis, incurrit. Ex quo tamen colligitur, uultum licere persona tegere matronis, modo uestitu sueto, nec adulterino, utantur. Sapienter ita sensisse Albertum, Saxoniae Ducem, nemo, saniori praeditus mente, negabit, quem, CRANZIUS refert, *Saxoniae Lib. XII. c. 23.* cum Lubecam uenisset, personatarum feminarum spectaculo offensus, Lubecensem senatum commonefecisse, ut abusum illum antiquaret, qui ut multis, alioqui pudicis, feminis praestaret audaciam: sic impudicis stultitiae daret incrementum. Immo honestas decet feminas, abstinere sponte sua a mascheris, ne forsan uerecundia illarum sub persona minus se contineat, sed citra personam se proferrat ac ostendat, ut loquitur LVDOVICVS VIVES de *Femina Christiana. conf. PACICHELLIVS de Laruis c. 6. p. 92.* Cogitent etiam, non omne, quod licet, uel impune fit, honestum etiam esse, *l. 42. pr. π. de Rit. Nupt.*

## §. XI.

Praesertim uero caueant, ne teneras adducant filias ad haec spectacula, omnesque sibi dictum putent, quod MARCVS AVRELIVS ad Faustinam suam dicit apud GVEVARAM, in *Horolog. Princip. Lib. II. c. XI.*

c. XI. Haec ideo, mea Faustina, dixi, quoniam filiam in theatra adducis, illam in capitolium comitaris, inter gladiatores versari, et pantomimis spectandis interesse, permittis, et, quod indignissimum, ipsa aetate sese teneram, tu, non ualde prouectam te, minime cogitantes, per uicos urbis ripasque fluminis discursitatis. Equidem id non uisupero, quod, filiam tuam improbam esse, censeam, sed quod ansam illi, ut minime proba sit, abs te dari, uideo. Crede mihi, Faustina, ad titillationem carnis quod attinet, nec iuuenibus nimis fidendum, neque de senibus bene sperandum: Sed tutissimum in utrisque, ut peccandi occasiones cuncti fugiant. Ideo scilicet uirgines uales intra parietis inclusae continentur, ut occasiones, quae in plateis offeruntur, uitent. Non, ut stolidiores, secessum amant, sed, ut prudentiores, congressum fugiunt.

## §. XII.

Ac uiduae si quando factae sunt, quam minime eas decet his uoluptatibus indulgere. GVEVARA, *Lib. III. cap. 40. seq.* Praefertim autem grauidae feminae, principes maxime, et summo natae loco, hoc sibi dictum putent, ne fortasse ex insuetarum formarum aspectu, uel ex alio his in turbis euentu, sibi ipsis malum contrahant, uel, si proprio non moueantur periculo, foetus, quem in utero gerunt, salus periclitetur, atque, uel abortus procuretur, uel monstrosi aliquid partui concilietur. Etenim quo pretiosior est liquor, et uas, quo continetur, fragilius et tenerius, eo sane maior est periculi, ne confringatur, metus. Cum igitur grauidae natura nihil fragilius, et infan-

infantuli anima nihil sit pretiosius, longe maxima opus esse cura, quis non uidet? GVEVARA, *Horol. Princ. L. II. c. 14. pag. 271.* ubi plura in hoc argumentum legi possunt, et *c. 17. p. 283.* ubi de choreis, saltationibus et cursibus, pauore repentino turbaque conferta, uitandis, agit.

### §. XIII.

Addunt nonnulli his aliud hominum genus, ad quod hermaphroditos referunt, qui uero non tam nouum constituunt sexum, quam ad utrumque inclinant et accedunt. Quicumque itaque in his sexuum praeualent, ad hunc referendi sunt, atque adeo, uel pro maribus, uel pro feminis, habendi, *l. 10. π. de stat. homin.* et istius sexus, quem maxime produunt, iure in mascherarum usu, haud immerito utuntur. Vtrum ἀνδρόγυνοι, utrumque sexum perfecte qui sistant, dentur, dubium est, cum eiusmodi hominis exemplum uix queat produci. Si tamen talis unquam homo reperiatur, rectae rationi non adeo repugnare, eum, quem duplici natura bono ditauit, utroque uti posse, uideretur. At, quum promiscuo hoc usu alii facile offendi et irritari possint, magistratui, ut unum eligat, nec, electo uno, alterum praeferat sexum, sedulo curandum, SANCHEZ, *de Matrim. Lib. 7. Disput. 106. n. 2.* HAHNIUS, *ad tit. de stat. bom. n. 3.* Quibus compositis, mascheris eiusmodi hominem uti posse, ita, ut sexus, quem elegit, rationem habeat, nemo dubitabit.

### §. XIV.

§ XIV.

Aliud hominum discrimen natura suggerit, quo in natos, et nascendos, dispescuntur. Qui in uentre adhuc feruntur, et nondum in rebus humanis sunt, l. 10. §. 1. π. de vulg. et pupill. substitut. per rerum naturam, mascheris non possunt uti. Est tamen etiam illorum in hoc argumento habenda quaedam ratio, ita scilicet, ut, quod antea diximus, matres, quae uterum gerunt, a coetu abstineant laruatorum, ne fortasse ex aspectu et terrore foetui fraus fiat, et calamitate abortus obruantur, arg. l. 2. π. de mort. infer. l. 18. π. de stat. homin. Cauere etiam debent personati, ne in praegnantem incidant mulierculas, uel aliquid, quo futura spes proles extinguere, uel malum foetui inferri queat, moliantur. Natos autem mascheris uti posse, quis dubitaret? quod nisi permetteretur, personis animi corporisque labores mortalium minueret nemo ac leuaret.

§ XV.

Aetatis ratione homines docentur esse impuberes alii, alii puberes; quorum isti uel ad infantiam, uel pubertatem, magis accedunt; hi uero imperfectae alii aetatis, quos minores; alii perfectae sunt, quos, quinque et uiginti et in Saxonia unum et uiginti, annos natos, maiores uocamus, de quibus omnibus DD. passim ad tit. de minor. consulantur, et, qui legatur, maxime dignus est Hoppivs, ad pr. l. de auctor. tut. De infantibus tantum non frustra la-

C

bora-

boratur. Quum enim perexiguum et fere nullum intellectus habeant usum, et delectatione, quam perfectae aetatis homines ex mascheris capiunt, minime moueantur, parum etiam rem istam, immo nulli curabunt. Neque tamen negare ausim, dari nonnullos, qui mature sapiant, atque in tenella aetate his rebus delectentur. Personas sumere his hominibus non licere, dici nequit, dum de eiusmodi infantibus, infantiae uel pubertati proximis, interdictum speciatim proferatur. Veruntamen, satius esse, nemo negabit, ab his rebus aetatem teneram arceri. Namque facile corrumpi possunt tales, et, adulta licet aetate, satis tamen cito, uanitatibus assuescunt. Conf. MANZIUS, *Decis. Palatin. qu. 50. n. 41.* Senes ipsa aetas, si nulla lex, auocat a mascherarum usu. Et enim uerecundos facit senectus, quam eiusmodi ludorum taedium cepit. Veniunt dies, et appropinquant anni, quos sibi non placere, aetate graues profitentur, ECCLES. XII. qui ergo placere possent id generis uoluptates? Nequicquam interim inficior, dari etiam homines, quos nec decrepita aetas a uoluptatibus deducit. Quem quaeso, fugit, Alexander VI. Romanus Pontifex, cuius propensissimum, in spectacula uidenda, animum, cum alia rerum monumenta, tum BURCHARDI historia arcana, quam illustri LEIBNIZIUS luci publicae dedit, satis testantur. At uero praestaret, eiusmodi homines praesentem ante oculos habere mortem, atque ad aliam sese uitam praeparare, quam ridiculis interesse tumultibus personatorum, quas in senum uoluptates, eos-

eosque, qui, in uestitu, leuitate iuuenili rapiuntur, grauissime inuehitur GVEVARA, *Horolog. Princip. Lib. III. c. 24.*

§. XVI.

Romano iure, pro diuersa homines libertate diuiduntur in liberos et seruos, quorum omnium conditio satis nota est, nec adeo opus, ut hac in re simus multi. Illud omnino dicendum est, neque legem extare, quae seruos retrahat a mascherarum usu, neque pro ipsa rei natura esse arcendos, quum non minimam iucunditatis speciem habeat, si impares dignitate ac inaequales tantisper inter se commisceantur, dominusque personam serui, seruus uero domini, sumat, PACICHELLIVS, de *Laruis, cap. 8. pag. 120. et insequent.* Ita serui ab his ludis non repelluntur, quos Romanorum iura exercebant, Romanosque ueteres ad ludos accersuisse, notum est, utpote quibus Saturnalia, dominorum habitu, celebrare quondam licuisse, DION CASSIVS scribit *Lib. LX. pag. 677.* et ATHENAEVS. *Lib. XIV. cap. 10.* Quid igitur esset, quod Nostrates hodie famuli, quorum conducta opera utimur, liberi alioquin homines qui sunt, arcendi ueniant, hominesque proprii? si modo id agant, ut, immodestia uel nimia turba, aliis ne graues sint, atque molestiam creent illis, qui honeste laetantur. Quae capienda esse, quilibet intelligit, de ea libertate, quam domini arbitrium seruis permittit. Modum enim sic ubi excedant, castigatione

ad officium procul dubio poterunt reduci, DD. ad l. un. C. de emend. seru.

### §. XVII.

Quod si quis hac occasione quaereret, an, in eiusmodi laetitiarum solemnitate, seruus laruatus a domino personato, amicis praesentibus, manu possit mitti? illud affirmare non dubitarem, quandoquidem ex §. 2. l. de libertin. constat, seruos quocunque tempore a domino manu posse mitti. Quod ita tamen temperandum est, ut personae ipsae, manumittens et manumittendus, nec non et testes, qui advocantur, cognosci possint, atque adeo certi de animo et facto esse queamus. Neque aliud dicendum uidetur, si quaestio instituatur de manumissione uindicta, an scilicet, praesente praetore, uel praeside personato, a laruatis, uel aliis fieri possit manumissio. Nam si quocunque in loco actionibus, quas uoluntariae iurisdictionis uocamus, et quocunque tempore, defungi possumus, l. 2. π. de offic. Procons. Si in transitu manu serui mitti possunt, ueluti: quum Praetor, aut Praeses, aut Proconsul, in balneum, uel in theatrum, eant, l. 7. π. de manumiss. uindict. dict. §. 2. l. de libertin. quidni et inter personatorum coetus, aperta tantummodo facie, id fieret? Sed uix est, ut assentiar. Namque, ut taceam, uerba illa non sic capienda, ac si uel in platea, uel balneo, uel theatro, manumissio coram Praetore fieri potuisset, sed civili intelligenda esse modo, minime nimirum necesse esse, coram Tribunali actio haec ut fiat, sed et extra locum istum,



istum, priuatis in aedibus, non minus legitime administrari, HOPPIVS, ad §. 2. *I. de libertin.* parum sane conueniens maiestati praetoris esse, arbitror, inter iocos et ludos seria agere, atque uoluntariam iurisdictionem exercere. Contemtionem, quam imprudentia haec parit, magistratus, qui sapit, canet, *l. 19. π. de offic. Praef.* Ecquis enim non rideret, Praesidem uel Praetorem, persona, saepenumero ridicula, indutum, seuerum magistratus uultum ostendere uelle? Ac, licet forte parum apta haec sint, non tamen prohibita statim ac nulla dixeris: interdicta nihilominus censentur, tacite saltem, quae magistratus minuunt auctoritatem ac laedunt, quando inter iocos gesta, pro re, publica auctoritate facta, ab emuncionis naris uiro, haberi nequeunt.

### §. XVIII.

Paternam potestatem si respicias, homines alios sui, alterius alios iuris esse, deprehendes, h. e. patriae potestati subiectos quosdam, quosdam minus. Vtrosque animos, labore fessos, uoluptate hac reficere posse, arbitramur, dum interdictum adducatur, quod ab ea quos excludat. Propterea tamen, quod filii subsunt imperio patris domestico, personis uti prius aliterque non possunt, quam patris uoluntas id permittat, GROTIUS, de *I. B. et P. lib. II. cap. 5. §. 2.* PVFENDORFIUS, de *I. N. et G. Lib. VI. cap. 2. §. 7. seq.* Atque hanc ob causam nullum quoque est dubium, quin pater, si quando sese filius, uel filia, personatorum coetibus, ipso inuito, adiun-

gant, pro re nata modice liberos castigare queat, arg. *l. un. C. de emend. propinq.* aut, si haec castigatio minus sufficiat, liberos immorigeros iudici puniendos offerre, *l. 3. C. de patr. potest.* Et si enim hi coetus publice habeantur, ac publice quoque permittantur: in publicis uero causis filius pro patrefamilias habeatur, *l. 9. π. de bis, qui sui uel alien. iuris.* sciendum tamen est, publicam causam in *dict. Lege* talem intelligi, quae statum publicum, publicamue utilitatem, uel ipsa spectat, uel per alia promouet aut impedit, qualis haec, de qua in praesenti agimus, neutiquam dici potest.

### §. XIX.

Excipit hanc tertia hominum diuisio, quae ciuitatis iure nititur, qua scilicet homines abeunt in ciues et peregrinos. Peregrini autem, sensu Romani iuris, dicuntur, qui ciues non sunt, siue nunquam ciues fuerint, siue ciuitatem Romanam amiserint: siue alterius ciuitatis sint, siue nullius. DVARENVS, *Disp. anniuers. Lib. I. cap. 9. pag. 19.* qua de re pluribus ac liberalius agit SCHILTERVS, *Dissert. de Iur. Peregrin. §. 9.* qui et in sequentibus exponit; quo modo hodie peregrini apud nos Germanos primo dicantur, qui ex aliis regni finibus ad nos ueniunt, imperioque nostro non sunt subiecti. Deinde, qui, licet imperii Romani sint subditi: non tamen ex eadem nobiscum prouincia, et eiusdem terrae domino subiecti; et denique, qui, cum sint eiusdem prouinciae: non tamen eiusdem municipii, aut oppidi, ciues.

Quo

Quo uero cunque nomine ueniant peregrini, nulla lege, nec in Italia, nec Gallia, nec Germania, ubi quidem solemnna Bacchanaliorum locum habent, peregrinos uidemus exclusos, quin et lubentissime ad haec inuitantur gaudia, et saepenumero illorum gratia instituuntur. Neque etiam ab his gaudiis legati exterorum, ministrique publici, cuiuscunque sint dignitatis ac ordinis, excluduntur, quorum dominorum saepe interest, ut his principum, ad quos missi sunt, delectamentis intersint, in quibus nonnunquam occasionem aucupari queunt, caussam domini ex uoto gerendi. Quo tamen loco prudentis ministri est, scire cauere, ne quid contra dignitatem fastigii, quod sustinet, admittat, aut turpiter se det, suumque dominum risui hominum exponat, aut occasionem det simultatibus, ex quibus contentiones, et alia incommoda, nascantur. Sane RICCIIVLLVS in *Tr. de Personis, quae in statu reprobo uersantur, Lib. VI. cap. 4.* monet, ut ministri publici, ob decus et gradus maiestatem, hos coetus frequentare, deprecentur, PACICHELLVS, de *Laruis, cap. 7. pag. 100.* Conf. de eadem Legati prudentia ALBERICVS GENTILIS, de *Legationib. Lib. III.*

§. XX.

Ciues, ciuitatis iura qui participant, nec aliter, ac peregrini suum nomen, uariis ciuitatem titulis tuerentur, illis in locis, ubi haec gaudia in morem abierunt, procul dubio his frui possunt. Namque in horum usum, publica ut leniant incommoda, eiusmodi res

di res admitti solent. Propterea uero, quod, qui in eadem uiuunt ciuitate, hodie ex iure Canonico in clericos et laicos diuiduntur, qua de distinctione ZIEGLERVS ad LANCELOTTVM, *Lib. I. tit. 4.* uidendus est, de utrisque hoc erit loco dicendum. Ad clericos quod attinet, hos, quod diuinis officiis mancipati sunt, ab omni strepitu alienos esse, decet. Qui si praetulerint uitam honestam, et nullo reprehendendam modo, quam Apostoli monita postulant. *1. Tim. III. 2. Tit. I. 7. 8.* populumque decenti industria instruxerint, ut is, ad illorum hominum honestatem respiciens, multis peccatis abstineat, fore, certum est, ut aeterna hominum salus rectius se habeat, et facile nobis tribuatur a maximo Deo et Salvatore nostro Iesu Christo clementia conueniens, ut ait IUSTINIANVS, in *l. 34. pr. C. de Episcop. audient.* Quam ob causam IUSTINIANVS eadem lege prohibuit, ne clerici cubos siue tesseras contrectent, nec his ludentes spectent, nec manus, oculos et aures prohibitis ludis polluant, alios ad ea ludicra inuitent, aut scenicorum uel thymelitarum spectatores fiant ludorum, aut, quae in theatris certantium ferarum fiunt, pugnarum. Quale interdictum etiam extat in *Non. 123. cap. 10. Auth. Interdicimus C. de Episcop. et Cleric.* quod factum est ante IUSTINIANVM ab HONORIO et THEODOSIO Imperatoribus, in *l. 17. C. de Episc. et Cleric.* quae est *l. 42. C. Theodosian. de Episc. Eccles. et Cleric.* ubi IACOBVS GOTHOFREDVS et de aleae interdicto sigillatim agit. *Non. Leon. 87.* Apud ISIODORVM de *Eccles. Officiis Lib. II. c. 2. pag. 596.* haec leguntur, quae GRATIANVS decreto inferuit *C. His*  
1gi-

igitur 3. d. 23. His igitur Lege Patrum cauetur, ut, a uulgari uita seclusi, a mundi uoluptatibus sese abstineant; non spectaculis, non pompis, intersint. etc. non uagis oculis, non effraeni lingua, aut petulanti, fluidoque gestu, incedant, sed pudorem et uerecundiam mentis simplici habitu incessuque ostendant etc. uiduarum ac uirginum frequentationem fugiant. Idem GRATIANVS ex Concilio Nannetensi c. Nullus 7. d. 44. haec addit. Nullus presbyterorum etc. nec plausus, et risus inconditos, et fabulas inanes, ibi referre, aut cantare, praesumat; aut surpia ioca, uel urso, uel tornatricibus, ante se fieri, patiatur, nec laruas daemonum, quas uulgo, (ut BYRCHARDVS addit,) Talamascas dicunt, ante se ferri, consentiat, quia hoc diabolicum est, et a sacris canonibus prohibitum. Immo adeo horrent sacra iura laruarum insaniam, ut uelint, clericum assidentem conuiuuiis, superueniente histrione, de mensa potius surgere, et abire, debere, quam eius motus ac gestus uidere, aut ipsum audire, ita Concilium Toletanum III. in Canon. 2. Irreligiosa de consecrat. distinct. 3. Cui textus, notatu dignus, iungendus ex cap. 1. X. Ne Clerici uel Monachi, ubi inter uitia seculi, et carnis concupiscentiam, refertur: Turpis uerbi, uel facti, esse ioculatorem, uel iocum secularem diligere, aleas amare, ornamentum inconueniens proposito suo quaerere, in deliciis uiuere uelle etc. canes et aues sequi ad uenandum, et omnibus quibuscumque causis superfluis interesse. Ecce talia, dicitur ibidem, et bis similia ministris altaris domini, nec non et Monachis omnino contradicimus, de quibus ait Apostolus: Nemo militans DEO implicat se negotiis secularibus. Quorsum etiam  
D perti-

pertinet INNOCENTII III. Constitutio in c. 15. X. de uita et honestate clericorum: Clerici mimis, ioculatoribus, et bistrionibus, non intendant. Ad aleas et taxillos non ludant, nec huiusmodi ludis intersint. Clausa deferant desuper indumenta, nimia breuitate, uel longitudine, non notanda. Pannis rubeis aut uiridibus, nec non manicis aut sotularibus consutitiis, fraenis, sellis, pectoralibus, calcaribus deauratis, aut aliam superfluitatem gerentibus, non utantur. Cappas manicatas ad diuinum officium intra Ecclesiam non gerant; sed nec alibi, qui sunt in sacerdotio et personatibus constituti, nisi iusta causa timoris exegerit, habitum transformari. Fibulas omnino non ferant, neque corrigias auri uel argenti ornatum habentes, sed nec annulos, nisi quibus competit ex officio dignitatis. Pontifices autem, in publico, et in ecclesia, superindumentis lineis omnes utantur, nisi monachi fuerint, quos oportet ferre habitum monachalem. Palliis diffibulatis non utantur in publico, sed uel post collum, uel ante pectus, hinc inde connexis. Quae omnia repetuntur cum in Formula Reformationis, per CAROLVM V. in Comitibus Augustanis 1548. Ordinibus Imperii sacris proposita Cap. XVII. de disciplina cleri; tum in Concilio Tridentino, Sess. 22. c. 21. Ex quibus omnibus satis abundeque apparet, utroque iure, tam Canonico, quam Ciuili, pariter ac Diuino, clericis, si non diserte, per bonam tamen satis consecutionem, usum mascherarum esse prohibitum. Quod si enim clericus omnem reprehensionis notam uitare atque sinistram suspicionem debet: quod si ludis, choreis, coenis, spectaculis abstinere: quod si, nisi uestitu decenti et ordini conuenienti, incedere non

non licitum : quis uellet dubitare, clericum excludi  
 ab eiusmodi iocis lusibusque mascherarum? Immo,  
 ne monstis laruarum in solemnitatibus clerici utan-  
 tur, satis diserte prohibet Idem INNOCENTIVS III.  
 in c. 12. X. de Vita et honestate clericorum. Atque inde  
 recte concludunt ZABARELLA, in Clement. 2. qu. 3.  
 de uita et honestate cleric. BARBOSA, ad Canon. Nullus  
 dist. 44. clericis prorsus interdictas esse laruas, nec  
 personatos illos incedere posse. Idemque sentiunt  
 LAMBERTIVS, de Iure pat. 2. 2. qu. 26. §. BEL-  
 LETTVS, Disquis. Cleric. p. 1. tit. de Disciplina Clericor.  
 §. 23. n. 7. et P. GABRIEL A S. VINCENT. Consil. seu  
 Respons. Moral. Resp. 76. n. 1. Porro clericos, multoque  
 magis regularem professos uitam, ioculatores atque  
 in scenam, pretii quaestusue causa, prodeuntes, item-  
 que arti assuetos, infames habendos esse, secundum  
 FRVCTVOSVM tradit PACICHELLIVS, de Laruis, cap. 6.  
 pag. 89. Atque P. GABRIEL A S. VINCENT. Consil.  
 seu Respons. Var. Resp. 73. n. 3. concludit, quod Episco-  
 pus ac Sacrorum antistes nullo modo licentiam dare  
 ualeat laruis se tegendi, cum per se malum sit, et  
 clericorum ac religiosorum statu indignum : item,  
 quod religiosi, obambulantes personati, grauissime  
 Deum offendant, et incidant in deuotionem, pro-  
 pterea, quod dimittant habitum, PACICHELLIVS,  
 d. 1.

## §. XXI.

Quamuis autem leges adeo salutare suppetant,  
 atque adeo ipsi religioni hac ratione nihil detraha-  
 tur,

tur, tamen omnis, qui in terris, Romanum Pontificem Ecclesiarum caput uenerantibus, Italia praefertim et Gallia, uersatus est, uel cum uenientibus ex regionibus istis collocutus, satis nouit, ista omnia ibidem parum curari, clericosque ad unum fere omnes nihil minus cogitare, quam ut regulas istas obseruent. Qua de re olim iam questus PHILIBERTVS BUGHYON, de *Legib. abrog. Lib. 2. Sect. 25.* et quis, ipsos Romanos Praesules interdum his deliciis non ufos esse, sponderet? Sane de ALEXANDRO VI. qui una cum filiis, filiaque, turpissimos nudarum meretricum lusus auidissime uidit, nemo dubitabit. Sic, FARNESIVM, Patrem purpuratum, cum FERDINANDI Imperatoris legatos hilarius excipere uellet, laruatum incessisse, SALOMON GESNERVS, in *Oratione de Personis sine Laruis etc.* refert, quod non pudet eundem PACICHELLIVM, de *Laruis, cap. 5. pag. 64.* repetere, sufficere ratum, si modo post Martis uesperas Bacchanalibus, ne exemplo suo offendant alios, ualedicant purpurati, alique aulici Romani. Quamuis uero non negandum sit, hodie Romanos Pontifices seuiorem prae se ferre disciplinam, cautioremque ita agere, ne uoluptates sequi probareque uideantur: Purpuratorum tamen, Episcoporum, aliorumque, uitam mascherarum deliciis distingui saepenumero, norunt omnes, qui Romanam aulam frequentarunt, nec dissimulat PACICHELLIVS, de *Laruis, cap. 8. pag. 125. in fin.* Neque etiam desunt Doctores, qui hanc rem laudent, atque, dum intelligunt, IUSTINIANVM mascheras Episcopis et clericis denegasse



negasse in *l. 34. C. de Episc. audient.* ipsum grauissimi peccati reum agant. Eo dementiae abrepti sunt Summistae, praesertim CAIETANVS, uerbo: *Laruae.* VIVALDVS, *cap. 13.* uid. PACICHELLIVM, *cap. 7. pag. 99.* Consuetudinem hi probant, quae in Lombardia esse dicitur, qua tempore carnispriuii, quod dicunt, clerici incedere queunt personati. Cessare enim aiunt eo casu suspicionem, quod populus offendi exemplo possit, excipiunt tamen sacerdotes et constitutos in maioribus, PACICHELLIVS, *d. l. pag. 99.* Alii rem admodum extenuant, ad minuendum peccatum, si debitis cum circumstantiis clerici Bacchanaliorum tempore incedant mascherati, ut ita loquar, P. VIDALIVS, in *Arca Theologiae Moralis, de Statu Eccles. Inquis. l. n. 18.* quam ad unius horae spatium in puncto laruarum et ludi citra peccatum pro ipsis restringunt P. VINCENT. CANDIDO, *Tom. 2. Disp. Moral. 26. 13. 13.* NARBONA, in *Horograph. Iuris, hor. l. n. 76.* aliter tamen sentientes de regularibus, quibus sub censuris laruarum usus interdicitur *cap. 2. Ne clerici uel monachi in oto.* Immo, monialibus mascheras quoque indulgendas esse, ablatis uirorum uestibus et armis, sed intra tamen septa monasterii, censuit *Sacra Congregatio V. Calend. Maii anno 1604.* quod RICCIVLLVS *d. l.* refert *Lib. 6. c. 4.* Quin et, constitutione Romana, religiosi regularibus tantummodo mascherarum usus est interdictus. Ex quo id concludere possumus, reliquis eum clericis esse permissum, arg. *l. 12. π. de Iudic.* aut, si fortasse, correctionem iuris communis non coniciendam esse te-

mere, aut tali argumentatione eliciendam, dixeris; non adeo multum saltem curari Romae, utrum alii clerici mascherati incedant, an minus. Reperiuntur uero inter illos ipsos, quibus saniora placent. Ex quibus Ictum, pietate singulari celebrem, CASPAREM MANZIVM in primis laudo, qui in *Decis. Palatin. quaeß. 50. n. 42.* Indigne, inquit, aliquando tuli, quando spectatorem harum ineptiarum uidi sacerdotem, ridentem et dicentem: plane isti se ita gerunt, uti uulgo pinguntur. Melius dixisset: ita insaniant et uitulantur, ut a diabolo insigantur, etiam propria malitia animantur, ut a Sanctis patribus reprobentur, ut a probis et prudentibus despiciuntur, ut a Deo seuerè quondam indicabuntur.

## §. XXII.

Inter Protestantes rarior est mascherarum usus. Quod si tamen in aulis Euangelicorum Principum haec gaudia admittantur, haud facile nostris clericis et uerbi diuini ministris iure dedecus hoc poterit obici, quod personati incedant, uel inter laruatos deprehendantur. Optime enim intelligunt, quid deceat uenerandum hunc ordinem, quantumque suo quisque exemplo proficiat uel noceat, atque quam plurima esse, quae, quamuis nec laudem, nec reprehensionem, mereantur, non tamen expediant, si uerbi diuini praecones illis utantur. Quod uel maxime usu uenit, si talia sint, ex quibus malum, uel mali saltem suspicio, uel deterior hominum uita, oriri potest. Qualia haec esse mundi gaudia, nemo facile

se negabit. A quibus, satius est, auocari auditores, quam, auide illa sectando, iisdem exemplo suo praeire, licet interdictum, quod clericos spectet, extaret nullum. Quod si tamen et inter Euangelicos sacerdotes deprehenderetur sui adeo oblitus, ut minime dubitaret uanis his sese immiscere, nae is dignus esset, qui deliceretur gradu, ac a sacris Ecclesiae ministeriis repelleretur.

### §. XXIII.

Cum clericis affinitatem quandam habent Professores, et alii Doctores in Academiis promoti, ita, ut a nonnullis quasi clericorum ordini adscribantur. CONRINGIVS, *Antiq. Acad. Supplem.* 67. pag. 364. in cuius rei ueritatem inquit ITTERVS, de *Grad. Academ.* cap. 5. th. 7. Etsi uero non desint huic sententiae argumenta, ac Professores uel Doctores multis clericorum priuilegiis fruuntur, atque, exemplo clericorum, a Principe non tuizentur, ut loquuntur, sed uossitentur, tituloque *dominorum* ornentur: etsi etiam, corpora Academica Praelatis siue ordinibus sacris accenseri, uideamus, attamen, accurate loquendo, omnes ac singulos Professores et Doctores clericos, h. e. diuinis ministeriis mancipatos, esse, affirmari nequit, ITTERVS, *d. l. DN. AB EYBEN, Elect. iur. Fend.* cap. 9. §. 13. Atque adeo iura illa prohibentia, quae de clericis agunt, ac supra sunt recensita, ad eosdem nequeunt applicari. Interim non improbanda sunt, quae de illis PACICHELLIVS, cap. 7. pag. 100. de *Larnis*, scribit: *Doctores ac Praelatos modeste ac temperanter in Aula Ferrariensi larnis usos, testatur*

tur TORQUATVS TASSVS, in *Dialogo*, *Inscripto il Gianluca*, imitationem uirorum fama praestantium commendans, uulgato satis PLATONIS exemplo. Itaque licet nulla lex arceat: satius tamen est, eiusmodi homines, qui gravitate iuventuti exemplo esse debent, in scholis praesertim, his rebus abstinere. Quod si uero Doctores illi clerici, accurate sic dicti, simul sint, nullum dubium, eos ab his gaudiis arceri.

### §. XXIV.

Doctoribus studiosos et discipulos iungimus, qui eadem ratione ad clericos referri solent, ac isti. His quidem, si in tali loco degant, ubi festi Bacchanaliorum dies celebrantur, uel alias mascheras induere suetum est, et nulla lex eos speciatim arceat, non denegatum, existimo, studia his interpellare rebus, et animum recreare iuuenilem. At, ubi eiusmodi solemnities recepta non sunt, in Academiis praesertim, haud permittendum ipsis est, ut laruas et personas induant, ob abusum et incommoda, quae ex his rebus, illis praesertim in locis, ubi desunt media coercendi temeritatem iuuenilem, nasci possunt. In Patavina Academia nimium indulgeri studiosis hac in parte libertatis, Itali ipsi conqueruntur, RICCOBONVS, de *Gymnasio Patauino*, lib. 6. cap. 13. cum BORELLO, de *Magistrat. l. 3. c. 9. et seqq.* PACICHELLIVS, de *Larnis*, cap. 3. pag. 47. In nostris Academiis hac de re sequens lex est: *Bacchanalia et personatas pompas in paganorum morem celebrare, sub relegationis poena uetiturum esto.*

XXV.

§. XXV.

Inter laicos caput extollens Imperator, Reges, aliique Principes et Magistratus, qui uel summam in republica potestatem, uel subalternam, exercent, et uariis honorum gradibus distinguuntur. Hos uero, si PETRVM GREGORIUM THOLOSANVM, *Syn- tagm. Iur. Vniuers. lib. 39. cap. XI. n. 5.* audias, a mascherarum usu plane alienos esse debere, concludendum foret. Ita enim scribit *dict. loc.* *Vocant Galli nostri personas has maschas et momos, quae nomina usque adeo borrida sunt et perniciofa, ut mirer, cur illi, qui se inter alios alicuius esse pretii, bonoris et dignitatis, iactitant et arbitrantur, uelint has induere.* Sane decet principes uiros, et qui aliis praesunt, circa res magnas uersari ac egregias, quae insignem prae se ferunt uirtutem, non res ludicras, inanes aut tales, quae uilissimis hominibus propriae. Ita enim non solum auctoritatem seruabunt sibi illaesam, uerum etiam suo solum exemplo plus efficient, quam multis legibus. Quales enim in republica Principes sunt, tales et reliqui homines esse solent, ita, ut, si Principes boni sint, ciues etiam hos mores aemulentur; sin mali, meliora sperari de subditis haud possint. Elegans est locus apud CICERONEM, *lib. 3. de Legibus.* *Ego autem, nobilium uita uictuque mutato, mores mutari ciuitatum, puto. Quo perniciosus de republica merentur uitiosi principes, quod non solum uitia concipiunt ipsi, sed ea infundunt in ciuitatem. Neque solum obfunt, quod ipsi corrumpuntur, plusque exemplo, quam peccato, nocent.* Et

E

paulo

paulo ante : *Nec enim tantum mali est, peccare principes, (quanquam est magnum hoc per se ipsum malum,) quantum illud, quod permulti imitatores Principum existunt. Nam licet uidere, si uelis replicare memoriam temporum, qualescunque summi ciuitatis uiri fuerunt, talem ciuitatem fuisse, quaecunque mutatio morum in Principibus exstiterit, eandem in populo secuturam: Et iterum: Ut enim cupiditatibus Principum et uitiis infici solet tota ciuitas, sic emendari et corrigi continentia.* Et sane :

Regis ad exemptum, totus componitur orbis, CLAUDIANVS, quarto consul. bonor. uers. 299. De quo argumento multa egregia congeffit apud LIPSIUM, Polit. Lib. 2. c. 9. DN. REINHARDVS. Ex quibus omnibus facile uideas, praeclare optimeque bonos agere Principes ac summos uiros, si, nulla licet lege cogantur, sponte abstineant ab his deliciis, eoque ipso reliquos, quibus praesunt, ab illis abstrahant, atque adeo uarios abusus, uariaque mala, quae his ex rebus sequi solent, exemplo suo impediunt ac praeuertant. Puduit praeclaros sane uiros, NERONIS aevi spectaculis seruire, ideoque personari accesserunt. Sed iubeat Caesar deponere personas, et sic, inter histriorum apparatus, illos deregebat hominibus, apud quos ipsi paulo ante gesserant Magistratum, omniumque ludibrio exponebat. XIPHILINVS, *Epitom. Dionis in Nerone.* Propterea tamen, quod Principes non semper in rebus magnis uersari possunt, sed opus est animi quadam remissione, qua summas pro publica curas temperent, atque alacriores postea ad

ad res arduas perficiendas accedant; non invidendum iis est, si, animi curandi causa, his interdum ludis uacent cum aliis ipsi. Quod et maximos optimosque nonnunquam fecisse Principes, atque ex rebus leuibus aliis quaesiuisse delectationem, notum est, atque exemplo AVGVSTI apud SVETONIUM *cap. 89.* comprobatur. Pari modo de FRIDERIGO II. Daniae Rege, memoriae proditum est, eum, si quando cum purpuratis indulgere genio paulo liberius uoluerit, ueluti deposita Regis persona, *Agite*, dixisse, *ludamus amici, ineptiaeque animum paulisper remittamus, dum Rex abest*: atque ita cum iis lusisse, mox ubi satis lulum ei uisum sit, tanquam assumpta rursus Regis persona, uultu ad grauitatem composito, iussisse ludo desisti, quod Rex rediisset, citante praeter alios RVPERTO, ad *Valer. Max. pag. 490.* Quod dum faciunt boni Principes, omnesque illustres uiri, ipsi intelligunt, his deliciis ita esse utendum, ut intra limites honestae remissionis consistant, neque id faciant, quod inhonestum esse et turpe, lex Dei et recta ratio docet, uel quod ab ipsis aliis est interdictum. Neque uero in has oblectationes nimium temporis impendant ac sumptuum, adeoque efficiant, ut res publica uel misellus populus hac ex re incommoda sentiat et detrimenta. Quod si fieret, nemo dubitabit, tum grauissime peccari ab ipsis Principibus, tum alios in peccata rapi, quae delirantium peccata saepissime postea, iusto Dei iudicio, nocentes pariter ac innocentibus premunt; adeo, ut utrique grauissime poenam luan, uid. FRITSCHIVS, in *Principe peccante.* Prae-

dicandi contra isti sunt Principes, qui parce, uel plane non, his rebus utantur, qua parte aula Imperatoriae Maiestatis, Diui LEOPOLDI ab exteris laudari solebat, in qua usus mascherarum non adeo frequens fuisse dicitur, PACICHELLIVS, de *Laruis*, cap. 6. pag. 87. Quod laudatissimum Magni Parentis exemplum Imperator Augustissimus, CAROLVS SEXTVS imitatur, atque in hac quoque parte eius disciplinae documenta prodit, cum harum uoluptatum parcissimus est, et tempus pariter atque impensas grauioribus domi forisque rebus impendit. In Germania, et Belgii utriusque prouinciis, nisi Bruxellis, et Coloniae Agrippinae apud Episcopum Argentinensem, Furstenbergium, Franciscum Egonem, laruosos se non uidisse lusus, testatur IDEM PACICHELLIVS, d. l. cap. 6. ead. pag. Sed in alias tamen quoque aulas eum morem penetrasse, nemo ignorat. Raro aulam Parmensem in Italia admittere IDEM assentitur, d. l. pag. 88.

## §. XXVI.

Reliquis uero minorum gentium hominibus, ignobilibus quoque, mercatoribus, opificibus, etc. laruas gestare, lege quadam generatim interdictum esse, non nouimus, atque adeo uti illis licebit, quousque nulla prohibita lege, ac certo hominum generi permissae, inueniantur. Immo nec de plebe quidem homines ab his gaudiis, si in aulis Principum celebrantur, repelli, experientia satis testatur, si modo modeste se gerant, nec libertate hacce abutantur.

Nam-



Namque ex hac re, ut iam supra dictum, capitur uoluptas, si magna imis ad breue tempus misceantur, ac subditi domino, ignobiles nobilibus, pauperes diuitibus, quadam tantisper iuris parte, non concedant. Immo ab his nec Iudaeos repelli, concluderem, modo cetera paria sint, illos praesertim, qui diuites sunt, atque cum decore personas induere possunt. Interim satius utique esset, inferioris homines conditionis ab eiusmodi rebus plane abstinere, BALDVINVS, *Cas. Consc. lib. 4. cap. 1. pag. 638.* Neque enim decet eos omnia imitari, in aulis quae fiunt, ac Principibus, animi leniendi causa, conceduntur, praesertim illis in locis, aula ubi non est. uid. DIET-HERRVM, in *Continuat. Spec. Speidelian.* uerbo: *Mascarada.* Atque ideo, cum Annaebergenses in Misnia aliquando Bacchanalibus laruati indulgerent, seuerè id a Principe interdictum, quod legi potest apud CARPZOVIUM, *Iurisprud. Eccles. Lib. 2. Def. 264. n. 26.*

### §. XXVII.

Quibus peractis, in iure personarum, matrimonii res se sistunt, quarum respectu uariae circa usum mascherarum quaestiones nasci possunt. Ac primo quidem quaeri hic potest: Num a personatis hominibus sponsalia celebrari possint? Qua quidem in re praestruendum est, sponsalia, nisi consensu partium, non constare, *l. 4. π. de Spons. l. 30. π. de R. l. cap. 26. X. de Spons.* atque adeo personas, nisi sibi cognitae, si facie minus, alia tamen certe ratione, sponsalia celebrare non posse. Qui enim consentiant de perpetua futura co-

habitatione, qui ignoti sibi inuicem sunt? Quod si itaque duae personae, non tantum corpore, sed etiam uultu, uel hoc saltem utriusque laruato, sponsalia celebrent, facile iudicare licet, nihil esse actum, cum neutra alteram nouerit, ac intellexerit, cuius sit conditionis. Ac, licet tales laruatae personae uerbis consensum declarent, atque sic dici possit, sibi adscribi debere, quod in conditionem alterius non diligentius inquisuerint, cum quilibet, qui cum alio contrahit, gnarus debeat esse conditionis illius, quod cum contrahit. *l. 19. π. de R. I.* facile tamen responderi poterit, minime praesumendum esse, inter iocos seria, et talia fuisse acta, quae maximam deliberationem exigunt, a quibus pendet omnis uitae felicitas, atque tam absurdum quenquam fuisse, ut sibi ignotum hominem coniugem eligere uoluerit, sed inter iocos, qui consensum non inferunt, iocose actum esse uideri. Vnde etiam DD. communiter concludunt, sponsalia iocose contracta, non ligare. CARPZOVIVS, *Lib. II. Jurisprud. Eccles. Def. 19.*

## §. XXVIII.

Quod si tamen supponamus, personatos illos homines sibi fuisse notos, uel aperuisse uultum, ita, ut una ab altera dignosci potuerit, testes insuper adfuisse, nec clam actum, ceteraque paria sint, ac recte se habeant; eiusmodi sponsalia pro ualidis habenda esse, non dubitarim. Neque tamen nego, iudicis arbitrium hic uim suam exercere, satiusque longe

ge et magis pium esse, si haec primordia matrimonii, sanctissimae rei, in aliud tempus differantur, quod magis commodum, atque cum Deo et precibus auspicia illius fiant, non inter iocos ac ludos. Immo, parum pium esse, arbitror, si personati per iocum sponsalia tractent, atque honestissimam rem et sanctissimam ludibrio exponant. CARPZOVIVS, *Jurisperdent. Eccles. cit. Lib. II. Def. 19. n. 9.*

## §. XXIX.

Quod ad ipsum matrimonium attinet, notum est, apud Christianos plerosque hodie receptum esse, ut *εὐλογία* coram Ecclesiae facie, et quidem ordine praescripto, in sacris aedibus accedat, atque ante, quam id factum, cohabitatio uiri et uxoris, non pro matrimonio, sed pro contubernio uel concubinato, habeatur, qua de re multa apud Theologos ac Iuris peritos passim legi possunt. CYPRAEVS de *Connubior. Iure, Part. I. cap. V. §. 6. et cap. XI. §. 15. et 20.* CARPZOVIVS, *Jurisper. Eccles. Lib. II. Def. 142. n. 9.* CHEMNITIVS, in *Exam. Concil. Trident. Sess. 24. cap. 1.* Nostrae disquisitionis tantum hoc est, an sub mascheris *εὐλογία* rite fieri, atque ita personati sibi inuicem iungi possint? quod omnino et prorsus negandum est. Namque uti nec sponsalia, ita nec ipsum matrimonium, ab incognitis sibi personis iniri potest, propterea, quod sic consensus deficiat. Deinde, licet de consensu satis constet, haud tamen est licitum ad aedes sacras, uel ubi tandem cunque homines, tan-

tanquam credentium coetus, et in nomine Iesu Christi, congregantur, larvas et personas admitti. Atque adeo, cum nec ad Ecclesiam tales larvae sint admittendae, nec ea de causa, *εὐλογία* poterit imperitari, immo, si, diuino humanoque iure neglecto, tale quid fiat, nemo, credo, dubitabit, nullam plane esse eiusmodi actionem. *l. s. C. de LL.*

### §. XXX.

Neque uero iocum hic adducere licebit, cum facultatem iocandi ministerii sacri actiones minime admittant, et seuera potius poena eiusmodi ioci uindicandi ueniant. Venit in mentem improbum factum, quod in uicini pagi caupona ante aliquot annos contigit, quam homines quidem perditissimi uina cum meretricula ingressi erant. Vnus ex his sacerdotis personam sumebat, atque alterum cum meretricula, more sacro, tanquam coniuge iungebat, qui et, commensationibus peractis, ut ne quid flagitio deesset, corpus postea per noctem hac cum nupta miscebat. Equidem, commissa hac nequitia, deperditi homines fuga saluti suae consuluerunt; caupo tamen et ipsius uxor, qui malitiam hanc hospitio promouerant, ex merito plectebantur. Ceterum, in quibusdam locis solemnem matrimonii professionem, praesente magistratu, in curia fieri, constat, qua facta, ad aedes sacras precum causa adest. Quod in Belgio fieri, nemo ignorat. HAHNIVS, ad WESSENBECIVM, *Tit. de R. N. n. s.* uerbis: *Benedicente nubent-*

*nubentibus etc. pag. 213.* ubi itaque hic mos receptus est, nec professio talis a personatis fieri potest, qui repellendi a curia potius sunt, quam ad illam, atque rem seriam administrandam, iocoso, sub hoc schemate admittendi.

### §. XXXI.

At iam faciamus, tempore, quo mascheræ in usu sunt, uel alio, uilissimæ hominem conditionis induisse personam Nobilis, uel alterius in quadam dignitate constituti: aperto uultu sub uestibus illis gessisse se pro Nobili, uel alterius dignitatis homine: ambiuisse nobilis uel alterius honestæ uirginis nuptias: uirginem assensisse, existimantem, illum, quem se tum dixerit ac gesserit, futurum. Comperta uero fraude, an uinculo quodam puella teneatur, dubium. Equidem, negandum illud esse, existimarem, atque nulla esse sponsalia, affirmarem. Quoniam enim intellectus, tanquam fons consensus, minus recte fuit informatus, quin potius deceptus, ideo, hanc in rem puellam consensisse, non est censendum, quæ conditionem nequaquam accepisset, si, dolo cognito, illum talem non esse, quem se gesserit, certior fuisset. PVFENDORFIVS, de *Iur. Nat. et Gent. lib. 3. cap. 6. §. 8.* Quod si in bonæ fidei contractibus doli etiam ratio ita habenda, ut, si causam dederit contractui, pro nullo sit habendus, l. 7. π. de dolo. l. 16. §. 1. π. de minor. l. 6. C. de præscript. long. temp. quidni idem diceremus de sancto desponsationis negotio,

gotio, quod ob gravitatem suam quam maximam, bonam fidem requirit. CYPRAEVS, de *Connubior. Iure* cap. 13. §. 58. B. DN. STRYK, de *Dissensu sponsalicio*, Sect. 2. §. 9. Quae omnia adeo uera existimamus esse, ut, licet iusiurandum accesserit his sponsalibus, tum iure Ciuili, arg. l. ult. C. de non num. pecun. tum etiam Canonico, propter capitulum, Cum contingat 28. X. de iureiur. quo Pontifex diserte iusiurandum, seruandum alioquin, stringere negat, si dolus interueniat, ualidiora reddantur. FRANTZKIVS, lib. 2. resolut. 4. qu. 4. Neque uero obiici hic poterit, dignitatem ciuilem ad naturam matrimonii non pertinere. Sufficit enim dolo esse deceptam, atque, quod consensura sponsa non fuisset, si, falsam, sciuiisset, sponsum induisse personam, NICOLA I, de Repud. cap. 2. n. 94. Nec male GERHARDVS dicit: *Dolum istum concernere substantialia matrimonii*, Loc. Theolog. cap. de Coniugio, n. 116. qui consensui resistit, cum consensus maxime matrimonium faciat, SANCHEZ, de Matrimonio, lib. 7. Disp. 18.

## §. XXXII.

De matrimonio consummato, tali casu, maior dubitatio esse potest. Neque enim temere Pontificii dissolutionem coniugum admittunt, matrimonio coram Ecclesia per *εὐλογία* et cohabitationem consummato, propter inueteratam, apud Protestantes uero explosam, opinionem, matrimonium esse sacramentum, COVARRVIVAS, de Matrim. P. 2. cap. 3. §. 7. n. 4. MOLINA, de Iust. et Iur. tr. 2. Disp. 259. n. 8. et 352. n. 5. Rectius

ctius tamen sentiunt illi, qui et hic, minus legitime  
 matrimonium initum esse, agnoscunt, CYPRAEVS,  
 de *Connabior. Iure, cap. 13. §. 58.* qui enim per dolum  
 se feminae iunxit, non Deo auctore, sed malo genio,  
 mendaciorum patre, id perpetravit, deceptique ec-  
 clesiam atque sponsam. Nec sane ex tali fraude com-  
 modum percipere debet. Quae sententia uariis rerum  
 iudicatarum inter Evangelicos monumentis compro-  
 batur, RICHTERVS, *Decis. 88. n. 25. et 30.* CARPZO-  
 VIVS, *Iurisprud. Eccles. Lib. 2. Def. 204. n. 12.* B. DN. STRYK,  
 de *Dissens. Spons. Sect. 2. §. 13. et Sect. 5. §. 49. seqq.* ubi  
 insigne exemplum, in quo eiusmodi matrimonium  
 pro nullo reputatum fuerit, quod inter callidissimum  
 nequam, et uirginem nobilem, propter apparitiones,  
 quas prae se ferebat, notissimam, et inter sectae suae  
 homines, pro Diua habitam, H. L. V. D. H. contra-  
 ctum refert.

### §. XXXIII.

Affinis quaestio est, de errore, qui consensum  
 etiam excludere dicitur, *l. 15. π. de iurisdic. l. 57. π. de*  
*O. et A. l. 51. π. de pact.* Fac itaque, eiusmodi homi-  
 nem, uestibus, statum atque conditionem suam su-  
 perantibus, sollicitare nuptias puellae: nihil plane de  
 sua conditione edixisse: Puellam adeo fuisse stolidam,  
 ut, uel diuitem, uel in honore constitutum, crede-  
 ret: comperire uero postea, mirum in modum se  
 esse deceptam. Sane errauit quidem hic femina, sed  
 errauit tantum in circumstantiis, et, quod decepta  
 est, suae debet temeritati acceptum ferre. Dum ue-

ro in personam consensit, actio illa, modo dolus absit, pro nulla haberi nequit, arg. *l. 51. π. de pact. l. 57. π. de O. et A. l. 9. π. de contrab. empt. uend. l. 21. §. 2. π. de act. empt. et uend. Canon. un. causf. 29. qu. 1.* Cum uero dolus dolosaeque persuasiones non uerbis modo, sed factis quoque, ac rebus, committi fierique possint; studiose inquirendum, num dolo malo personam istam induerit homo, ut, licet non uerbis, reapse tamen, simplicem deciperet puellam. Quod sane si factum sit, non debet fraudis suae fructum sentire, *l. pen. C. de legat. cap. 2. Ex literis X. de dolo et contumac.* Neque hic, nimis credulam fuisse sponsam, poterit obiici, quando sponsi calliditas longe est deterior, cui nequitiam indulgendum. Conf. B. DN. STRYK, de *Dissens. Spons. Sect. 2.* Immo, si maxime de dolo malo non adeo constat, nec nulla sponsalia dicenda: aequitas tamen postulare potest, ut ab eiusmodi sponsalibus recedatur, IDEM, *d. l. Sect. 2. sb. 30. e. c.* si puella talis sit conditionis, ut, nisi nobili, nuptura non fuisset. IDEM, *d. l.*

### §. XXXIV.

Quod si in persona ipsa, propter fictitium habitum, error aliquis fuit commissus, consensum sponsalitium et matrimoniale plane impediri, nemo dubitabit, *c. un. c. 29. qu. 1. l. 9. pr. π. de contrab. empt.* Si e. g. forte ille, qui sponsus debet esse, deprehendat aliam, sponsae suae uestibus indutam, atque illi matrimonium promittat, cum eaque congregiatur, uel spon-



sponsa in eiusmodi errorem incidat ; nec sponsalia, nec matrimonium, rata sunt habenda, ob errorem in persona commissum, qui, ut dictum, consensum excludit. In huiusmodi errorem incidit Iacobus, cui a Labano Rahelis loco Lea fuit adducta, quod coniugium, nisi Iacobus ratum habuisset, nullum fuisse, omnes fatentur, per *cit. Canon. un. cap. 29. qu. 1. LAYMANNVS, Theolog. Moral. Tom. 2. lib. 5. tract. 10. p. 4. cap. 2. n. 1.* Non quidem ob dolum, qui fortasse in Lea fuit nullus, quippe quae imperio patris obsequens existimauit, a patre se desponsatam esse Iacobo, adeoque iure in lectum duci. Quid ? quod patris, tanquam tertii, dolus, cuius ipsa non fuit particeps, fraudi esse non potuit, B. DN. STRYK, *d. l. Sect. 2. §. 16. et Sect. 5. §. 58.* Sed, uti dictum fuit, ob amorem Iacobi, qui cum Lea nequicquam desponsatus, existimabat, Raheli suae se cohabitare. Ceterum, si dolus personatae huiusmodi personae ipsius accedat, nemo dubitabit, ea propter eiusmodi actiones nullius momenti esse ac ponderis, quin immo, quae grauissima vindicentur poena, mereri.

### §. XXXV.

Inito matrimonio, inter coniuges circa mascheras quoque possunt quaestiones suboriri. Competit nimirum marito, si non iure naturae, atque extracatum, quo sponte sua femina se subiicit, certe iure Diuino, itemque Canonico, Ciuili ac Saxonico, potestas ac imperium in uxorem, uti uxor contra ma-

rito debet animi demissionem, obsequium ac reuerentiam, *Genes. III. 16. Ephef. V. 22. 1. Cor. XI. 3. Canon. 15. c. 33. qu. 5. uid. ARNISÆVS, de Iure Connubiorum, cap. VII. Sect. 1. seqq. l. 4. C. de Crim. expilat. haered. l. 14. §. 1. π. solut. matrim. l. un. §. 7. C. de rei ux. act.* Qua ex re id sequitur, uxorem; prohibente ac nolente, immo et ignorante, marito, mascheras induere, et laruatorum coetus frequentare non posse. Id quod etiam satis aperte probatur ex *l. 8. §. 3. C. de repud. et Nou. 117. c. 8. ibi: Si circensibus, aut theatris, aut amphitheatris interfuerit ad spectandum, ignorante, aut prohibente, uiro.* Cum enim uxoris actiones pendent a uoluntate mariti, tanquam familiae capite; huius potissimum interest, uxorem domi se continere; nec frequenter obambulare, aut uirorum coetibus interesse. Hoc enim modo et res familiaris optime administrabitur, et mariti animus multis uacabit suspicionibus. Ex quo sequitur, uxorem haec et similia, inscio, uel prohibente marito, facere non posse, praefertim autem laruatam minime foris pernoctare debere, *d. l. 8. C. de repud.* Quin immo prudentis mariti est, operam dare, ut uxorem ab huiusmodi rerum uanitate, ludisque ac spectaculis abstrahat, adimatque occasionem peccandi. Quam in rem multa legi possunt apud *GVEVARAM, in Horolog. Princip. Lib. II. cap. 9. 10. seq. ubi cap. 8. haec habet. Quod uxores mariti suas amant, oblectant, in deliciis habent, carumque fidei plurimum credunt, laudo atque approbo. At quod refragari uxoribus, per alienas oberrantibus domos, mariti uel non audent, uel non uolunt, id uero nitiupe-*

*ro et damno. Nam utut per se bonae fortassis sint, tamen ut uanae habeantur, ansam praebent. Quod si mulier contra officia peccet, et, monita licet, a proposito omnino non desistat, nullum est dubium, quin castigari a marito possit, quatenus alias eiusmodi emendatio concessa est marito, l. 3. §. 3. π. de SCto Silan. l. 14. §. 1. l. 24. §. 5. π. Solut. matrim. Nou. 117. cap. 14. CARPZOVIVS, in Prax. Crimin. qu. 12. π. 50. HAHNIVS, ad WESENBECIVM, tit. de Nupr. n. 6. B. DN. STRYK, Diff. de Alapa, cap. 2. num. 8. Conf. DN. PARENTIS Oeconom. Iur. pag. 89. seq.*

§. XXXVI.

Immo, secundum Iustinianeuum ius, tantam uxoris temeritatem sufficientem diuortio causam praebere, ex d. l. 8. C. de repud. et Nou. 117. satis intelligitur. Equidem, hoc, aetate nostra, paulo aliter se habere, non nego. Respuit enim hodiernus usus, hac parte Iudaeos imitans, Iustinianeuum ius, quod paulo facilius, ac par est, in concedendis diuortiis sese exhibet; sed potius ad doctrinam, quae in sacro continetur codice, dirigitur. Quod si tamen, ad mascherarum usum, inuito marito, uel prohibente, qui fit, aliud quid accedat, ex quo ualida commissi adulterii suspicio nascatur, matrimonii uinculum dirumpi ideo, usus, ac Protestantibus haec tenus receptus mos, docet. uid. B. DN. STRYK, de Dissensu Sponsalit. Sect. 5. §. 3. Quem tamen, non nego, dubiis expositum esse. Nam cap. 10. et 12. X. de praesumpt. quod in partes uocant, procul dubio de

de diuortio, quod matrimonii uinculum soluat, intelligi nequit, cum licentiam det, mortua demum uxore, aliam ducendi, et ius Canonicum diuortium tantum a thoro et mensa admittat, LANCELOTTVS, *lib. 2. tit. 16. §. 8. seqq. ibique* B. DN. ZIEGLERVS, Immo uix credibile est, Christum de suspecta adulterii femina locutum esse. Interim tamen, si sponsus experiatur, sponsam nimis libere his rebus operam dare, facilius repudio, quam diuortio, locum fieri posse, non reclamarem. Quod si fortasse uxor corrumpatur ab aliis, ut, inuito marito, laruas induat, et laruosos coetus frequentet, utilis actio serui corrupti marito accommodari potest, arg. *l. 14. de seru. corrupt.* quae actio etiam locum habebit, si tantummodo quis hac parte tentauerit uxorem, arg. *l. 20. C. de furtis et seru. corrupt.* uid. OLDENDORPIVS, *Classe VII. act. 2.*

### §. XXXVII

Ad officium mariti equidem pertinet, ut sumptibus necessariis pro dignitate atque facultatibus uxorem instruat, *l. 28. π. de religiof. l. 1. §. 19. π. de uentre in poss. mitt.* SVRDVS, de *Aliment. tit. 1. qu. 32. seq.* Quaeri itaque potest: Num sumptus ad mascherarum usum petere possit ab inuito marito uxor? Quod quidem utique ex antea dictis est negandum. Quod si tamen maritus, illam personatis interesse, uelit, uel fortasse uxor in aulicis uersetur ministeriis, et ex uoluntate dominae illam laruis

larvis indui oporteat, aliud erit utique dicendum. Quando enim maritus uel ipse uult, ut intersit hisce rebus, uel in aula uersatur, consentiente marito; non poterit ipsi displicere, si hanc in rem sumtus erogandi sint, uel alia, quae minus ad palatum sint, insequantur.

### §. XXXVIII.

Sed possunt tamen et hac ratione uxores quid exigere a maritis. Namque licet imperium nullum sit uxori in maritum: poterit tamen et ipsa interim a marito postulare, quod aduersetur mutuo coniugum amori. Non iniusta itaque erit eius postulatio, si uelit, marito non nimis frequentem esse mascherarum usum, maxime, si cum suspectis uersetur feminis, multoque magis, si cum impudicis. Sane, Iustiniano iure, ubi maritus, uxore praesente, cum impudicis mulieribus, quod maxime castas etiam excitat, coetum ineat, aut alia cum muliere frequenter uersetur, uxorem a marito diuertere iure potuisse, ex *l. 8. C. de repud. et Non. 117.* notum est. Etsi autem, hocce diuortio causam dare, hodie non dixerim: non iniqua tamen postulatio est uxoris, ut maritus ab his rebus animo suo temperet. Eodem iure nititur, si mulier contradicat marito, qui inuitam illam persona induere, et ad sub maschera laetantium

G

coetum

coetum adducere uelit. Contra ea, si maritus frequenter his rebus indulgeat, non potest etiam hos adeo mores improbare in uxore, cui eos colendi auctor est. Per enim iniquum est, uirum ab uxore id exigere, quod ipse non praestet, *l. 13. §. 5. π. ad l. lul. de adult. can. 2. causf. 32. qu. 6.* Antequam uero abeamus ab hoc de matrimonio argumento, illud tantum addendum, in nuptiarum solemnibus, animi causa, saepissime laruas et personas indui, quod, ubi nulum interdictum extat, tolerari potest, modo abusus absit, neque mala inde exempla oriantur, uid. PACICHELLIVM, de *Laruis*, cap. 7. pag. 97.

### §. XXXIX.

Tractatum nuptiarum sequitur adoptio, qua patria potestas ac munus pariter, ac per iustas nuptias, administrari potest. Cuius occasione quaeri potest: an arrogatio, uel adoptio, speciatim sic dicta, a personatis fieri possit? Sane cum utraque, ex *tit. I. π. et C. de adopt.* auctoritate publica fieri debeat, atque plane indecens sit, adire Principem uel magistratum sub mascheris et laruis, pariter id negandum esse, existimo, ac supra dictum §. XVII. de *Manumissione*, quae omnia, cum hic, tum ad *Questionem de Emancipatione*, poterunt applicari.

### §. XL.

§. XL.

Ex argumento tutelae parum forte, credideris, ad operam nostram trahi posse. Sed tamen nec hic sterilitate laboramus. Quaestio moueri posset: Num praetor personatus, tutorem dare possit, anue laruatus tutor constitui. Quod quidem omnino negandum uidetur, propterea, quod, si maxime de personis constet, haud tamen deceat, illa, quae iure magistratus geruntur, sub laruis fieri, prout supra fuit dictum. Eodem modo, quod prius dici debuisset, facile inter omnes constabit, non posse ita tutorem dari: *Ille liberis meis tutor esto, qui primus in carnis priuio personatus apparebit.* Et si enim ignotus quoque a patre dari potest tutor, ut Diui Fratres rescripserunt, l. 15. §. 14. π. de excusat. §. 10. I. de excusat. tutor. uel curat. omnes tamen consentiunt, hoc tantum de ignoto facie intelligendum esse, non uero de illo, cuius mores ignoramus. Mores sane illius, qui datur, perspecti utique esse debent, si, probatos illos fuisse patri, dixeris, cum certo iudicio quis debeat, per suam tutelam, posteritati suae cauere, §. 27. I. de legat. Quomodo autem, quaeso, tali casu id fieri possit? atque sic tota illa actio inanis erit, l. 20. π. de testament. tutel. di. §. 27. I. de legat. uid. HOPPIVS, Dissert. de iure ignotor. c. 2. m. 8.

## §. XLI.

Ipsa tutela est vis atque potestas, h. e. facultas, aut ius, quid statuendi ac faciendi, tum in persona pupilli, tum in rerum pupillarum administratione, *l. 1. §. de tutel.* Atque tutor non tantummodo rebus, sed etiam pupilli moribus, praepositur, *l. 12. §. 3. de admin. tut. et curat.* Ex quo consequitur, tutorem etiam prohibere posse, pupillum ne larvas induat, atque ad personatos accedat. Immo peccare tutorem, si hac in parte negligentem se gerat, et patiatur, teneram aetatem illecebris hinc corrumpi. Curatoris non tanta potestas est in personam minoris, cum eius cura in primis res respiciat, et postea demum in quibusdam ad personam se extendat. Atque hinc etiam, licet habeant curatores adolescentes, illa tamen, quae ad suam tantum personam pertinent, libere agere possunt, *l. 101. §. de V. O.* Nullus tamen dubito, et curatoris esse, cauere, quoad eius fieri potest, ne adolescens, cuius curam gerit, in eas res incidat, quae ad praua deducunt. Et si uero tutor peccet, necessaria denegans pupillo, uel curator minori, atque, tantum suspectus, uterque remoueri possit; immo, si propter inopiam neget, alimenta posse decerni, idque per mendacium, ad praefectum urbi extra ordinem puniendus remitti debeat, *§. 9. et 10. l.*

de



*de susp. tut.* ibi DD. Omnia tamen haecce ad illum non pertinent, qui sumtus ad mascherarum usum suppeditare detrectat, quin potius nullum dubium, peccare tutorem, uel curatorem, si tales sumtus, haud expedientes pupillo, uel minori, faciat, l. 1. §. 4. et 5. de tutel. et ration. l. 12. §. 3. de admin. et peric. tut. et curat. l. 32. §. 5. ibi: *sumptibus uoluptatis causa* π. eod. MONTANVS, de Iure tutel. cap. 40. n. 44. seqq. Atque adeo aegre ferre non debet, si eiusmodi impensae postea ex rationibus expungantur.

## §. XLII.

Quod si tamen fortasse pupillus, uel minor, in ministeriis aulicis uiuat, uel alias ob conditionem personae suae non possit commode et honeste se subtrahere his lufibus, uel si occasione eiusmodi rei Principis gratiam aucupari queat honeste, non impediendus est a tutore uel curatore, qui et sine periculo sumtus hanc in rem tum poterit subministrare, pro dignitate et facultatibus pupilli, uel minoris, arg. l. 12. §. 3. l. 13. π. de admin. et peric. tut. et curat. Cum de administratione tutorum loquimur, venit in mentem, an, si fortassis pupillus, uel minor, in hereditate paterna habeat uestimenta eiusmodi pretiosa, aliasque res, quae ad usum mascherarum pertinent,

G 3

tutor

tutor illas res sine decreto uendere ac alienare possit, aliisque solemnibus, quae in *Tit. de rebus eorum, qui sub tutela uel cura sunt, etc.* requiruntur. Cuius rei decisio non erit difficilis, modo constet, num res hae tales sint, quae seruando seruari possint, an secus? Priori casu, cum res istae morali aestimatione immobilibus aequiparentur, haud ualide fieri poterit alienatio, solennibus legalibus destituta, l. 22. C. de administ. et peric. tut. et curat. ubi DD. Posteriori casu aliud dicendum erit, DD. ad l. 7. §. 1. π. de administ. et peric. tut. et curat. Quatenam autem res tales sint, quae seruando seruari possint, HAHNIVS docet ad *tit. de rebus eorum, qui sub tutel. etc. n. 3.* Quae hac parte a DD. congerantur temperamenta, superuacaneum est, hic recenseri, et alibi legi possunt.

### §. XLIII.

Potissimum uero officium tutoris est, ut auctoritatem praestet pupillis, uti curatores consensum minoribus, qua de re peculiaribus titulis in libris ac compendiis iuris, agi solet. Hic illa se sistit quaestio: utrum a laruato tutore pupillo, cum aliis laruatis hominibus contrahenti, auctoritas praestari possit? quae quidem quaestio ex superioribus facile solui potest. Quod, si enim personae sibi inuicem ignotae sint, incertumque, quis ille, qui pro tutore se gerat, nihil actum utique

utique est, et censendum potius, iocatos esse personatos homines; quam serio id egisse. Quando tamen aperto vultu omnia haec gesta sunt, atque de consensu partium constat, atque reliqua se recte habent; non uideo, quae tandem causa sit, quam ob rem sola persona, qua reguntur, negotium impediatur. Omnia uero haec intelligi uelim de negotiis, quae extra iudicium geruntur. Nam de illis, quae, praesente praetore, aguntur; causis, iam saepe dixi, ualde absolum esse, si coram magistratu personati compareant, uel ipse magistratus personatus officio fungi uelit. Atque haec, quae proxime dicta, ad curatores seminarum, quae maiores, similiter applicanda, qui alioquin, cum nullam habent bonorum administrationem mulierum, curae suae committuntur, nec in earum personas potestatem, CARPZOVIVS, P. 2. C. 15. Def. 33. n. 6. et Def. 38. non impedire poterunt mulieres, quo minus mascheris utantur, uel has in res sumtus faciant. Quoniam tamen consilio iuuare debent easdem, curatoris est, prudenter monere, ne sibi noceant, sed ut tum sumtibus, tum famae, parcant. Omnia, enim, quae in bonis fortunae quisquam potest facere, damna ne minimae quidem famae iacturae aequari possunt. Si quis vulgi sermonibus famam suam, ueluti scopum sagittarum, obicit, e centum sagittis uix una aberrabit. Rursum uero, cui pudor perit, quique nulla existimationis cura afficitur, ab eo non

*non est, quod opus ullum laudabile expectemus.*  
GVEVARA, *Horolog. Princip. lib. II. cap. 10.*

## XLIV.

Haec igitur de iure mascherarum, ad *personas* quod attinet, tradidisse, sufficiat. Ea uero, quae de eodem iure, quoad *res et actiones*, dicenda restant, in praesens addere, arque institutum nostrum ulterius prosequi, temporis ratio non finit, praesertim, cum Noster Iurium Candidatus remis uelisque in patriam omni festinatione contendat. Itaque in hactenus dictis potius acquiescendum erit. Interea Summo Numini sit laus, honor et gloria.







Österreichische Nationalbibliothek



+Z162945603



